

14 JAN 2001

Malaysia-Cuba/I

MALAYSIA SEDIA TINGKATKAN HUBUNGAN DENGAN CUBA

Oleh: Ahmad Zukiman Zain

KUALA LUMPUR, 14 Jan (Bernama) -- Malaysia akan meningkatkan lagi hubungannya dengan Cuba berikutan pembukaan kedutaannya di Havana, kata duta Malaysia ke negara itu, Mohammad Kamal Yan Yahaya, hari ini.

Sebagai duta pertama Malaysia ke Cuba, Mohamad Kamal Yan berharap dapat menghadapi cabaran baru apabila beliau mengetuai kedutaan itu mulai hujung bulan depan.

"Cuba dan Malaysia mempunyai banyak kepentingan bersama... kami telah bercakap menentang dominasi Barat dan mempunyai pemikiran yang sama mengenai globalisasi," katanya dalam satu wawancara dengan Bernama.

Sambil menyifatkan pembukaan kedutaan Malaysia itu sebagai "tepat pada masanya", beliau berkata ia akan memperluaskan lagi kerjasama politik dan ekonomi serta hubungan kebudayaan antara kedua-dua negara.

"Terdapat juga potensi untuk meningkatkan hubungan perdagangan... kedutaan dapat membantu wakil perniagaan Malaysia yang lebih besar di Cuba," kata Mohamad Kamal Yan, yang akan berlepas ke Havana pada pertengahan Februari ini.

Beliau berkata tahun lepas, Matrade, agensi yang mempromosikan perdagangan luar Malaysia, menyertai Pesta Perdagangan Antarabangsa Havana yang diadakan setiap tahun.

"Saya akan cuba mendapatkan Presiden Fidel Castro untuk melawat Kuala Lumpur...peluang yang terbaik ialah semasa Sidang Kemuncak Pergerakan Berkecuali (NAM) di Bangladesh awal tahun depan," katanya.

Perdana Menteri Datuk Seri Dr Mahathir Mohamad berada di Cuba pada April tahun lepas bagi menghadiri Sidang Kemuncak Selatan Kumpulan 77 (G77) yang dianggotai negara-negara membangun.

Sebelum pelantikannya sebagai duta, Mohamad Kamal Yan adalah timbalan wakil tetap Malaysia ke Pertubuhan Bangsa-bangsa Bersatu (PBB) di New York dan timbalan wakil Majlis Keselamatan PBB. Misi Tetap Malaysia di New York pada masa ini diwatikahkan kepada Cuba.

Beliau adalah antara enam duta baru yang menerima watikah pelantikan daripada Yang di-Pertuan Agong Sultan Salahuddin Abdul Aziz Shah pada Selasa lepas.

Mohamad Kamal Yan, 46, juga diwatikahkan ke Jamaica dan Bahamas serta Republik Dominica yang berbahasa Sepanyol dan Haiti yang berbahasa Perancis.

"Saya berasa sangat terharu dengan pelantikan ini dan bersyukur kepada kerajaan terutamanya Menteri Luar Datuk Seri Syed Hamid Albar yang memberikan kepercayaan dan keyakinan kepada saya untuk menubuhkan kdutaan itu," katanya

Mohamad Kamal Yan yang berkelulusan ijazah sarjana sains Perkhidmaan Luar Negeri dari Georgetown University di Amerika Syarikat.

Kedutaan di Cuba dapat dijadikan pintu masuk untuk mempromosikan kepentingan nasional Malaysia kepada keseluruhan rantau Caribbean itu, katanya.

Kedutaan itu akan membantu menyediakan tukaran berita dan maklumat antara Malaysia dan negara-negara di rantau itu sebagai usaha menggalakkan kerjasama Selatan-Selatan.

"Ini akan membolehkan negara-negara itu mendapatkan berita secara langsung daripada satu sama lain, dan bukannya dari pihak ketiga atau media Barat," kata Mohamad Kamal Yan, yang berkahwin dengan Sabrina Datuk Ismail. Mereka mempunyai anak lelaki berusia 18 tahun dan dua anak perempuan berusa

16 tahun dan lapan tahun.
-- BERNAMA
AZZ AZZ NAK